

Öise Lade 5-2012, p. 62

Sch'ins di ch'insatgi haja in'idea sturna, lura n'è quai normalmain betg in compliment. In'idea che na funcziuna betg. In'idea schizunt absurda. Ma n'èn betg gist las ideas che midan insatge sin il mund a prima vista ideas sturnas?

Da 100 ideas sturnas è forse ina da quellas ina che vala a la fin sco geniala. Uschia in'idea sturna



### In'idea sturna

è per mai l'idea da far biera sin passa 1500 meters sur mar. Cun graun che crescha er en l'aria fina da talas autezzas. Jau pass mintga di sperasvi ad in champ da granezza. Sin 1650 meters sur mar. Uss èn las spias anc plantinas finas e pitschninas che pruin pir. Anc bler pli pitschnas che las spias giu la Bassa. Ma sche jau ves il champ, hai jau gia uss il gust da la biera en bucca. In gust amar, ferm, savurus e tuttina fin. Nus bavain quasi mo pli questa biera. Perquai ch'igl è ina biera indigena che jau poss cumprar en la butia dal vitg. En gnanc ina mes'ura fiss jau davant la porta da la bieraria a Tschlin. E pudess guardar co ch'il bierer fa sia lavur.

Far biera en ina regiun che n'è betg ina regiun dal graun; en ina regiun fitg alpina. In'idea sturna. Quai din schizunt ils producents sezs. Ma igl è in'idea cun potenzial. La biera sa venda bain. Ins savess vender anc bler dapli. Dentant: la gestiun n'è betg simpla. Ins sto u stuess pudair far investziuns immensas per lavurar bain ed a moda effizienta. E quai n'è betg adina lev. Dentant: dapi l'onn 2005 datti la Biera Engiadinaisa u la biera da Tschlin co ch'ins la numna. E quella na svanescha betg uschè spert. Era sch'igl è difficil da far biera amez las Alps uschia che quai renda era financialmain.



David Spinnler